

廣文書局印行

小方壺齋
輿地叢鈔

(三二)

舟行記

潛山張必剛著

陸有車馬水有舟皆能達南北路抵○京師而舟行較車馬稍逸吾自皖城登舟沿鳩江歷采石至金陵易舟抵廣陵再易舟渡淮水亂黃河陟直河衝泃口挽牕河宿濟甯再易舟越南旺跨臨清循衛水浮交河泊天津再易舟沂白口止通州水行凡三千餘里經吳楚齊魯燕漕經潮牕衛白必五易舟乃至其自潯山抵皖城凡百里自通州抵○京師凡四十里皆乘車鞭馬提行李卒從以來水陸既皆可達○京師陸行之勞頓既不如水逸而陸行止二千七百餘里水行多五分之一近迥不同然而求事之速者未有不勞求身之逸者未有不迂以滯故冀得而兼焉然吾之來此除游憩與羈候僅一閱月耳亦不爲不速其沿途所經歷自皖城至金陵水皆東向流自廣陵至濟甯水皆南向流自南旺至天津皆北流自白口至通州又南流水東流北流皆順南流皆逆故自南方來○京師始順次逆次又順次又逆自○京師往南方反是一往來間水不能皆順不能皆逆對待而交易本事理之恆無足怪而人心則忽欣欣然喜忽戚戚以憂君子之自處也卓然有定宰於中無妄撼於外故閱兩岸之景可以陶性情覽城池都邑村落之勝可以商今古納朝暮煙雲之變可以窺元化坦坦施施檣帆任其卷舒順不爲遭時逆不爲失意斯曠蕩不役於物而茫洋以自娛夫水流無定態者以風與之迎送愈多參差矣何必役役容心爲或者謂水行厄乎風濤而陸行無是然亦有陰雨也車馬覆壓以折患更與舟同善處之水不必危不善處之陸不必不危吾惟不擇物而操其在己故不以彼易此

省闈日記

吳縣顧 祿著

道光壬午七月朔癸酉知涵香文廟執事辦果子始議先發適君繡過從語及同行君繡欲之遂訂初八日離郡

初七日己卯侍父祀江神令張福治裝隨役卽遣辭戚友見餽贐禮

初八日庚辰巳刻拜辭祖慈以次庭訓諄諄諸父昆季及至戚好相送登舟少選君繡剝行李上船乃發更次出澚墅關宿望亭柝鳴野戍秋暑蒸人玆月欲墜始就枕席

初九日辛巳黎明解維至清甯汎水淺舟膠牽挽寸進迫暮僅出熙春橋泊九龍山日薄崦嵫山光漸暝遠眺蓉湖尖景色絕麗星斗繁天燈火耀岸使蕩以晝舫佐以清歌風景何減白堤

初十日壬午曉發小金山連朝密雲不雨稻田幾稿枯槁聲四野相聞鄉人閔旱歲歉可憂申刻入常郡惠濟橋雨陣虹見卽霽泊藤舟亭蘇文忠公讀書處也亭殊不葺然樓閣臨水頗臻幽勝

十一日癸未辰巳間舟膠毘陵驛以麻索努力絞行勞擾良久止行里許水縮載重舟子謀小舟般剝急不能待與君繡易小舟翠囊裝過行食頃出西門風帆順利勢若奔馬行二十六里過奔牛鎮宋明帝遺沈懷明擊孔覲曾至此築壘又十八里過呂城閘閘水湍激有聲甚壯明月滿船涼風襲體過雲陽已夜分矣

十二日甲申小泊新豐鎮居民市肆頗盛沽酒甚香洌李白詩云南國新豐酒東山小妓歌卽此也疑肉甚嫩行二十七里過丹徒鎮居人多織簾爲席岸高於山過老人閘風雷大作電影騰掣舟小幾傾幸爲風水所冲攔住沙岸急繫纜而定雨行三十里泊市口聞宋太祖置堰軍四處而呂城及京口在焉船舫櫂比多楚巫巴客酌酒鬪毆幾致失足夜觀金山塔燈風濤擊船聲有聲

十三日乙酉風潮益勁榜人不告便風解船君繡亟捉予登陸見江中驚濤駭浪舟搖兀如一葉掀舞由北固山梁武帝改京口城樓曰北顧樓故又名北顧山多峭崖如削然皆土也宋史誤以爲石壁寺曰甘露有宋吳琚所書天下第一江山六字在榜委折行四五里達河神廟吾船已進港順風張帆懲昨日狼狽約舟人搖櫓進發不應舟中見金陵羣山蒼翠萬狀蜿蜒數十里俄頃雲氣接天連續不斷申泊龍潭驛君繡苦舟中掀簸商從旱道發登岸探詢驢買較殺於棲霞雇定八騎約候曉即發返舟聞後行船多有折檣破帆者小舟叩舷買魚頗賤蚊如讎疊船矮不復能設幬夜大風舟人增纜驛卒驚遽不寐達旦十四日丙戌策蹇登程亂嶺縱橫層折而過土人駕獨轆小車七八輛聲軋軋然後進發行三十里飯朱家店赤日滿空過紫金山墮驢者再且喜草褥青輦身如因風荷葉寸膚不傷申西間過孝陵衛西望明陵基址蒼藹規制閼壯進東華門汗流浹體跋履殊苦蓋距朱家店又行四十里矣尋入滿城棄代步捉銜以從君繡先至鈔庫街全寓雲芝出迎賓至如歸夜臥甚酣

十五日丁亥早起詣北府塘武廟拈香夜長板橋玩月迤東至水關一望青溪笛步間溪名九曲發源鍾山吳繫東渠爲之邀笛步即在青溪橋之右今上水關是也河船三五放乎中流中設道場僧取財宣佛號與鼓鑼聲相應水面放連花燈遠眺如明星萬點錯落波中中元薦亡多於臨河施放焰口蓋金陵舊俗云

二十一日癸巳侶梅過訪買糴偕往城北一路隄淨如埽雞犬閒暇鳬鴨浮沈土人多持竿釣魚舍舟至隨園園爲袁太史子才別墅依小倉山成院落迴廊高下複室層疊環宅皆流泉石壁青林文篠四面亦別無人居忽聞木犀香遂蹤迹至隱仙庵庵在清涼山西去百餘步地極幽邃司香淪茗饗客憑闌少憩桂馨一山沁人心脾殿後高閣一椽有老梅大可數圍葉陰映蔽云是六朝間物欲訪四松園遍叩不得

徘徊歧路間忽二扉豁開秋色盈階相詫良久乃趑步而入見沙山迎面色如紫金而光有洞可拾級而上旁亭曰四照其下旱船一桀怪石林立古松三四樹髯甲天矯如蛟龍闌前羅植鴈來紅斑斕奪目客至不叱不迎予方以誤入桃源未敢逗遛遵故道而歸述所見於君繡曰公等欲往四松園乎所游者卽是也相與鼓掌而笑夜與君繡談詩

二十四日丙申晴早起涼爽如深秋飯已謁蔣侯祠在鍾山下數百步松柏森列石碣尙存侯名子文漢末討賊戰亡吳大帝詔卽山下立祠以祭改曰蔣山

二十八日庚子跨衛出聚寶門游雨花臺臺在長千里南地多五色石晚步石城西北火雲如山奇怪萬狀明日之熱可畏矣

二十九日辛丑秋暑酷甚雖有微風了無涼意乃打槳至蓮花橋登岸行數里抵清涼山山下居民結綵爲棚沿街供地藏王像香火燈燭比戶皆然上山進香者率大戶婦女晚煙四起滿路皆朱萸繡轎各有蒼頭小婢簇擁下山而去返舟微雨暑猶未艾揮扇不止

八月初四日乙巳丹崖約遊正覺寺寺本名水月庵地極狹陋嘉慶某年住持獲教匪方容升有功柏制軍請闢沿城一帶民房給帑建造朱門三級漚釘獸環宛然宮殿厯院落數重悉峻宇雕牆刻角丹楹無纖毫塵埃○賜有正覺禪寺額

初六日與君繡等至東花園度竹籬錦鱗池伏秋草腴荒雖有蘆棚幾處揭青帘賣白酒而酒徒紛擾不足流連相與至三山街街甚廣闊夾道皆廊浮屋買賣者甚眾競買土宜將歸以貽人

初七日戊申蕩河船出水西門弔盧莫愁湖團團十里撲鼻猶聞荷香壁間題詠甚多後有勝棧樓奉中山王徐達像紅袍烏紗奕奕如生兩朝勝蹟千古留名誰謂英雄兒女有時盡哉少憩落日銜山清風吹

衣促舟子回櫂

十三日甲寅同君繡買歸舟繫河下約先束裝上船候明晨放開行涼甚

十五日丙辰申刻與君繡飲於桃葉渡鱗雲鬢丸月不明兩人對酌頗失登望之興憶曩歲與徐香林買燈河舫雙繫平分皓月一天爭豔盈耳今香林已作故人而景色亦懸殊矣說者謂秦淮鑿自祖龍水由方山來西流沿石城達於江春夏之交潮汐盛至秋杪冬初水落不通舟楫故泛舟者自初夏迄仲秋爲多然今年閏餘秋早水縮已徑尺矣則盛夏可知也又云竹醉日較往日尤盛傾城出游游船數百震蕩波心船皆覆篷廠上懸角燈下設回欄中施几榻盤盃簞簞之屬靡不精良船四面不設窗窻便於顧盼有大走艗小走艗之稱歸寓遣郭玉至侶梅寓擊囊裝

十六日丁巳早出三山門雲夢送至大功坊而別坊爲中山王故里登舟進發泊燕子磯下磯石甚嶮峻本名鷹門山臨江瞰水形如飛燕故名居民市肆何止數百家其間復有巷陌往來憧憧如織瞥見及肩土垣胥衣薜荔紅榴萬棵燭耀垣外柴門面江剝啄久之一老僧出迎頗矍鑠自言年九十二歲不出關者蓋七十餘年矣顴頰如丹鬚鬢無白者起視中堂供三世佛金容掩色一廢蘭若也庭廣可數畝悉種榴樹卽牆外所見者僧外一鄉農灌漑茶罷辭出入宏濟寺捫蘿側足歷三重懸崖峭壁撲面飛來崖下連亘數楹旁廊一殿局鍵甚固僧戒不可窺探左轉至鐵索鍊孤舟危閣一楹以巨練數市環繞峭壁壁上皆丹藤翠蘿羅絡如寶裝屏風徙倚良久而下復循石徑覓沿江十八洞人迹罕經僅通樵牧踣躅行二里許始達第一洞乃長臺洞也洞口有椒紅泥牆屋就洞穴爲之中供古佛一僧侍香火屋後石壁黯黑不可辨相將覓第二洞風氣騰空山雨欲來急趨返舟黃天蕩雖無風亦浪湧是夜雨細風靜一波不驚比曉已入御河口

十七日戊午平明出萬緣山莊萬枝髡柳煙雨迷離舟中遙望板屋土牆幽邃可愛舟人挽繆行急誤竄入罾網中遂致勒豁登岸相勸幾爲鄉人所窘償以百錢始悻悻散行百餘里灘頗日暮不敢發約去港口數里泊江潮大來荻蘆如雪肅肅與風相搏推窗看月是夕正望宛如紫金盤白水湧出水勢益長洲渚有聲與君繡侶梅縱談聞金山蒲牢聲知漏下矣覆衾而眠

十八日己未夙興風淒冷如暮秋初卸裘解舟渡七里江江中有二島左曰鸛山舊傳有棲鸛右曰雲根島皆特起不附俗謂之郭璞墓旭日初升望金山頂塔金光四射樓觀如畫瞬息入京口申刻抵雲陽觀音山對面有觀音寺寺前又有練光亭下闕練湖湖又名開家湖相傳開氏七世同堂歿爲水神保障一方黃昏過大王廟前有淮陰侯坊夜行五十四里遇糧艘下南舟阻毘陵

十九日庚申飯已尚阻不行旋見糧艘魚貫而泊乃得徑過行四十三里過洛社傳以爲樂道德出身處行三十里泊錫山漢末識記云有錫天下兵無錫天下甯自光武以後不復產焉蓋自南望亭以北夾河皆長岡高壟多陸種黍麥或灌木叢篠氣象窘隘至是稍平曠而山水亦秀絕囑舟子竟夜進發歸心如箭不得鼾睡

二十日辛酉早抵筭山予以船擠跳岸買小舟先行命張福掣行李伺啟關而進還家拜見祖慈暨嚴親曰吾計女此時當歸也

舊鄉行紀

休甯邵嗣宗著

癸亥春正月八日由太倉起程晚至崑山

九月十日舟次吳閶

十一日自吳江至烏鎮

十二日至杭州東新關

十三日過江塘是夜舟泊錢塘

十四日曉發經三潮江紆迴曲折溯流而上夜抵富陽

十五日渡桐江經富春山一路山勢重疊高岡綿互迴抱合省迤邐而入柳子云舟行若窮忽又無際此殆似之自是以上率以爲常是日晚霽夕陽如赭江月皎然

十六日過釣臺經乳香巖至嚴州嚴故睦州宋以前先世居之今則支派在嚴者譜系無可考矣夜大風雨舟次宗潭

十七日渡馬沒灘波清若鏡可鑑毛髮至倉後灘溪水奔溢如駛舟不得上自是灘水之迅日甚一日每涉一灘泉聲若吼過則淥水澄澈波紋如縠

十八日早發將至茶園有山萃起絕壁峻嶒午刻雨甚篷窗縮瑟山色迷濛但一片煙景耳過藻河民居傍山依水斜交密布崖石礚然築亭其上綠樹映帶左右夜泊遂安港口

十九日復雨過淳安經響山潭四圍高山潭中有響四山皆應

二十日雨甚舟不得進阻錫行渡

二十一日渡雲頭潭至八郎廟灘勢險急較前益甚四山積雪寒氣逼人

二十二日雨雪渡米灘牽鐵鏈橫石灘三灘爲微河最險處過此則水勢略緩矣夜泊綿潭雪益甚

二十三日天霽渡莊溪而上夜泊岑山山峙中流林木蒼鬱樓閣隱現望石仙居

二十四日發程山渡夕春未下抵屯溪

二十五日雨易小舟至梅林水漲舟不得進

二十六日雨至休甯縣

二十七日雨謁家祠

二十八日雨

二十九日晴霽候親族之在城者

二月一日謁磬村下曹林祖塋

二日至六日積雨泥濘

七日往龍源吾宗自司訓思宜公於明洪武四年遷龍源迄今四百年矣夾溪而居支派蕃衍今亦稍衰

八日往霞村

九日往西館環珠

十日往甌山至座主金慕齋翰撰第并至石嶺

十二日往水南歷古城巖

二十一日至二十六日飭祭事

二十七日大雷雨卯刻迎先府君神位入祠祠前樹木表一立經魁額午刻祭祭畢合族會食

二十八日族人設公席

三月一日辭別親黨歸吳

四日早發下汶溪天色清明波光蕩漾午刻抵屯溪

五日發屯溪春水灌河舟行若鶩峰迴路轉倏忽變態晚至街口

六日至清安泊百步街

七日過嚴州晚至鸕鷀源口

八日過桐廬日亭午風甚舟不進次新店灣

九日已刻至富陽風復甚舟不進

十日抵錢塘江易小舟進杭州城再易舟夜發

十一日曉至新市經含山是日清明節遊人雜沓有水嬉者夜泊大船坊

十二日午刻至吳閶

十三日辰刻抵家

雪鴻再錄

青浦王 昶著

乾隆五十三年二月初一日以驗收騰越城工赴迪西初七日至龍尾關得富制府綱書始知調任江西蓋仰荷○○聖慈以雲南路遠量移近省故也惟江西地丁二百餘萬年衰多病之人仍予錢糧重任爲慚悚爾二十九日還至鎮南州吏部文始到遣人進摺謝○○恩并請○○陛見因是時已屆錢糧奏銷之期遂上奏俟新任布政使李 承鄴到日交代起程六月初一日李君抵昆明初五日交印遂以十二日前行百姓供花置酒炷香以送者自省城至鷓鴣哨幾二百里不絕與譚撫軍尙忠別於官廳與司道別於興福寺又小飲而散是日至板橋各府州縣及佐雜送者百餘人辭之乃宿

十三日申刻抵楊林前此連旬陰雨及時晴霽輿人快之嵩明州陸紹宗及江西餘干縣高鳳肅運銅在滇俱來見

十四日從瀟湘江行三十里抵海潮寺微雨禮佛登樓松竹環秀水雲沓嶺其間忽露濃翠絕境也方丈中懸鄂剛烈公容安書唐人海暗雲無葉山寒雪有花句筆力雄勁可想見其致命遂志之概蓋公少時隨文端公總督來此故時時有遺墨然鄂張兩家不相能而此書頗似得天風力何歟下有雲連樹色微分岸船載波光直到門聯句句爲昆明孝廉陸 藝作王夢樓文治昔以待講出守臨安見是聯吟賞之由是郵傳人口 藝字漱亭其弟藻字江萍兄弟皆能詩而漱亭尤工畫余之將行也江萍撰五言五韻詩余以烏目山人畫冊贈之漱亭復作畫扇贈行題句云頻年繪事率操觚墨寶詒來勝珮珠試仿耕煙清妙筆滿山風雨送行圖兩君昆明之偶也申刻抵易隆爲尋甸境晚晴宿

十五日知州王序端來見云尋甸催科不易四面皆山幅員袤五六百里山寨中居民絕無貿易日取苦蕎和穀屑之索其家無藏數十錢者婦稚複襦不完寒則焚枯於側而已貧人鬻田而留戶名田主以賦

與之屬其代納資人因爲乾沒計故受追比者實無田之人而田主無名追呼又不能及是以民欠頗多追之急強者抗差而不服弱者雖到官鴛衣百結扑責亦無益其拮据如此迤東百姓窮於迤西證以所聞不誣也早飯行三十里過關索嶺小憩下板橋又五十里抵馬龍州知州朱士鼐山西介休人宿於州署之澄齋有池有樹有橋有亭乘月眺望風景頗勝

十六日曉雨旋止行四十三里滿山皆蕎麥花花紅者苦花白者甘故甘蕎爲多至三岔驛飯又過茶亭塘二十里抵霑益州境署知州盧陶來見先是緬酋孟允嗣立以兄孟駁曾抗○王師又屢與暹羅構讐移其阿瓦城於宋寨而令頭目業貌瑞棟等具金葉表文并氍布檀香及馴象十由木邦耿馬土司乞納款制府以聞且責其送還從前被遮之楊重英而屬余往大理以受其降至是書來云頭目已見詞意極誠懇楊重英亦以六月初一日自阿瓦送出云

重英緬境久且病送至孟養而死

十七日晴由霑益分嶺而下土山戴石高率數尺許如圭壁如弁冕如神剌鬼鑿湖嵌不足數也行可十里至白水驛又爲南甯所屬館舍後胡桃數株參天合抱下有石磴石澗小山離立極佳蓋似昔人廢墅

十八日陰過棠梨灣始微晴至楊威哨入平彝縣境知縣熊孔榮來迎經青溪洞巖屋如哆脣吻下巖數十席供佛其中有僧居之石皆皴瘦透余前此曾游其半今聞洞中水多沮洳暑中饒蛇蝎未暇繼前游也小坐茶話至縣署宿

十九日微晴五十里至滇南勝境則出雲南境矣過玉宣觀汎見新選雲龍州知州王鳳文爲鴻臚寺卿劉君增中表四千里抵亦資孔遇思茅同知徐孝標吳縣人以引見回滇談○京師事甚悉是夕微寒不知正入中伏也

二十日飯畢行十里過峨郎塘村後有溪沿溪迴欄短約屋瓦鱗鱗後有長廊繞之景幽勝或謂此鄧檢討蘭溪再馨所居吸光飲潔宜其早踐瀟華也小憩馬桑塘又三十七里至劉官屯宿

二十一日晨雨過庚戌橋卽西林渡也雨止四十五里過楊松塘楸槐蒙密沿路離立雜以樓欄濃陰如幄其下茅茨數十家婦稚皆有自得色自入黔境秧田上下彌望青葱與往年迥別又二十里飯於上寨晚霽風極涼昇輿者皆踴躍又四十七里宿於白沙是日行兩日程亦資孔劉官屯上寨皆普安州境白沙普安境

二十二日微晴得家信云六月初連日大雨官道水深四五尺繞榛莽巖礪中行騎駝多損壞者家眷幸以十二日至鎮達下水矣過半坡塘俗謂之老鷹畦自畦而下屈曲數十盤幾四十里因此知滇境之高申刻宿於阿都田安南縣境也

二十三日十里渡毛口河蓋西麻渡水自此達於重安江最湍急使縣官作木筏數十此十餘站中不惟便行人亦利於載貨物江中亂石數處開除亦易惜懶於事者計不及此自毛口行山勢漸陡卽拉帮坡矣盤曲亦四十里及頂始迤邐下由打鐵關十里至郎岱是處有同知駐之夜大雨

二十四日晨冒雨行山岡起伏波陀上下雜以泥淖頗爲滑刺至坡貢飯西風起稍晴由繁花塘三十里過白水河登望水亭亭正值飛瀑積雨後噴薄而下望之如十輛車如百練帛如疾雷迅霆大地震動蓋前兩次過時當冬春水涸故未獲見此奇觀也又行三十里夜抵鎮甯州城署州事胡繼來見蓋湖州庚寅孝廉亡友胡石田彥穎編修再從姪也

二十五日行六十五里至安順府提督保君成帥其五營將校來迎知緬甸進貢奉○○旨允行不必更俟楊重英且令其頭目於木蘭圍畢後進見與蒙古藩王同○○賜筵宴今貢使貢物已於二十一日在

大理啟行矣適威甯鎮總兵許君世亨至此君以去秋奉○○旨領黔兵赴臺灣合勦林爽文等臺寇平陸授浙江提督仍令送兵回黔再赴新任蓋軍營舊識也因言林爽文莊大田等賊眾雖多皆烏合福公廉安海公蘭察鄂將軍輝及提鎮等率川楚黔粵兵先從北路直前奮擊一戰而潰林爽文遁至生番社圍擒之其南路莊大田等聞信亦駭散一併俘獲兩人各起事實非同黨云

二十六日早行天極晴山風時作未覺爲大暑也自郎岱東來山峰多拔地離立如米稟然石紋層疊土人斷而分之用蓋屋可以代瓦故謂之石板房汎云晚至安平

二十七日晴西風作涼仍可御綿夾衣也路平坦稻田中均有山泉貫注漚漚鳴不已過界首龍井蘆荻諸塘六十五里抵清鎮

二十八日由清鎮行經高樹鴨江諸塘凡五十里未刻抵貴州省治李撫軍・吳學使壽易及司道府縣皆來迎遂徧拜之至暮晉安州知州王元顯開州知州馮克章候補知縣杜成皆來謁元顯同年丹忱日香之子丹忱從溫相國軍沒於本果木以難磨得官克章魯巖光熊之子由美諾通判陞此杜父杜蔚原任商州知州余舊屬也癸未門生藩憲武罷官在貴陽授經亦來見時驟熱與清鎮迥殊相去不百里而氣候相懸如此

二十九日吳學使及司道招同許君及福建鹽道孫君思庭集於城東門外觀音寺戊刻始散吳君以所刻時文見示貫串經術不愧作者

七月初一日李撫軍招飲以禮辭遂行四十八里至龍里縣宿是日雲陰且多風夜雨極涼

初二日晨雨行五里霽抵新安塘露日色頗熱過牟珠洞不入小立洞門前涼風刺骨於此知仙山洞壑中自有清涼世界也經乾谿塘早稻已吐穗花亦香甚至貴定